


113
565
7



55

60

65

門 4 13
號 565
卷 7

宸垣識畧卷十三

仁和吳長元太初氏輯

郊坰二

右安門在外城之西南隅

南營外南二守備署在右安門外關廟

廣恩寺在右安門外西三里菜戶營舊名清勝寺俗呼

周橋寺寺有燕山府清勝寺慈慧大師塔幢宋宣和

七年建

考按宣和五年金以燕京及涿易等六州還宋至

七年十月宋郭藥師始以燕山叛降金此幢是七年二月所立故以宣和紀年

九蓮慈蔭寺在右安門外三里草橋之北明崇禎十五年建有悼靈王像

碧霞元君廟在右安門外十里草橋北數十武士人呼爲中頂

右安門外南十里草橋唐時有萬福寺寺廢而橋存天啟間建碧霞元君廟其北

吳巖游中頂詩十里城南綠滿川春風春柳白經

年名園幾廢靈祠在孤負看花穀雨天歲以四月一日開廟

都人士女競喧奔花市闌珊廟市繁已見田田

好荷葉風流憶殺趙王孫趙松雪萬柳堂觀荷贈歌伎解語花詩

草橋在右安門外十里衆水所歸種水田者資以爲利土近泉宜花居人以蒔花爲業有蓮池香聞數里牡丹芍藥裁如稻麻然諸花悉備獨不能養蘭惟萬明寺有蘭數本橋去豐臺十里中多亭館元廉右丞之萬柳堂趙參謀之匏瓜亭栗院史之玩芳亭要在彌望間然莫詳其處矣

王士禎過草橋詩垂楊匝地板橋橫沙路青驢得
得行偶坐濠梁忘日暮可憐泉水在山清橋西二
水清濁
割然至橋東合流土人云清
者自西山來濁者渾河也

查嗣瑤穠咏詩草橋十里百花妍只有幽蘭種不
傳生長山中畏塵土托根誰羨帝城邊

湯有曾自黃村歸經草橋詩按鷹臺北接春郊信
馬閒行未覺遙尺五城南好光景到天烟色柳條
條 右安門外舊池亭別墅參謀堂右丞今日草
橋清淺水還留一縷照衰興

野雲廉公希憲子都城外創造園亭名花幾萬本京
師號爲第一一日于萬柳堂張筵邀疎齋松雪兩學
士歌姬劉名解語花左手折荷花持獻右于舉杯歌
驟雨打新荷之曲松雪喜而賦詩爲一時佳話

元趙孟頫卽席贈歌姬詩萬柳堂前數畝池平鋪
雲錦葢漣漪主人自有滄洲趣游女能歌白雪詞
手把荷花來勸酒步隨芳草去尋詩誰知咫尺京
城外便有無窮千里思

查嗣瑤萬柳堂詩梁園于頃牡丹紅不及廉園一

萬叢未老先歸賢相國肯將花事媚東宮

祖氏園在草橋水石亭林壇一時之勝游草橋豐臺者
往往過焉乾隆初年歸于王氏今又易主矣

王上禎祖將軍園亭詩鄰鄰水石映前灘落落松
簧返照殘蓮葉蕭條蒲葉短并將鳬雁作荒寒

宋榮遊祖氏園詩園林晴日散芳菲曲徑藤稍欲
罷衣愛殺水亭風景好蒲芽纔吐燕初飛 挿天

高柳碧絲絲一片東風淡蕩吹彷彿隋家堤上過
露條烟葉叫黃鸝 亭北名葩取次看一枝將放

倚雕闌梁園記得春深日斗大花開綠牡丹 高
臺突兀俯紅亭樹杪西山一抹青誰繫斑駁花鳴
外故吹長笛使人聽

葉映榴和宋牧仲游祖氏園亭詩十年花信匆匆
過見說南園憶舊遊記得故人聯袂去一觴一詠
亦風流 十里芳塵馬足輕兩堤烟柳接山青入
門苔路盤紆細行盡迴廊見水亭 湘竹屏風紅
板橋一池春水映花嬌踏青人過驚沙鳥隔岸香
來翠袖招 畫簾開處水雲涵花氣侵人酒易酣

好景滿前應得句不須重唱舊江南

沈德潛看豐臺芍藥過王氏袁詩開到將離四月
天城南隨路訪平泉銖衣寶曆俱留眄瘦燕肥環
總可憐一抹山橫飛鳥外孤筇人倚亂霞邊諸君
終作探花使慘綠應推最少年 路入花源柳半
遮亭臺舊是故侯家繁華頓醒三更夢明麗仍披
五色霞遂戶飛飛通乳燕野田閣閣開鳴蛙登臨
振觸鄉園景彷彿神遊對水涯

地卽祖氏園王阮亭尚書賦詩所云

水田一帶
學僧衣也

年氏園在草橋

沈德潛過草橋年氏園看芍藥詩城南饒菰蒲陂
塘淨寒綠閒園平田際徑術繚而曲同人赴嘉招
林陰駐車轂亭臺位帖妥堆阜互起伏名花故將
離繽紛耀羅縠揅援扶低亞篆牌分種族對花把
尊酒念舊感華屋白楊乍成樹朱輪已摧軸天時
變燠寒人事有往復浩浩發高歌穠艷偶娛日吾
徒一餉樂取適匪取足醒酒來清風松濤響謾謾
○金南郊臺在南城豐宜門外金大定間拜天于此又

名拜郊臺金因遼舊俗以重五中元重九日行拜天之禮重五于鞠場中元于內殿重九于都城外

○金太祖平遼碑在南城豐宜門外今無可考

元果邏洛納新詩十丈豐碑勢倚空風雲猶憶下遼東百年功業秦皇帝一代文章太史公石斷龍鱗秋雨後苔封鰲背夕陽中行人立馬空惆悵禾黍離離滿故宮

百泉溪在府西南一十里麗澤關平地有泉十餘穴匯而成溪東南流入柳村河

百泉地卑泥濘四時不乾一僧誓填之功未就旋壞已數年矣

元宋駿城南俚歌柳村南路百泉涌陷車躓馬沮洳深熒熒一僧獨負土治道不成徒苦心

豐臺在右安門外十八里居民尚以藝花爲業草橋河接連豐臺爲京師養花之所元人園亭皆在干此有御製豐臺行詩碑二

豐臺之名不知所始洵之士人并無臺也

原按金時郊臺在南城外豐宜門者金之南門也

豐臺疑卽拜郊臺因門曰豐宜故目爲豐臺

王士禎豐臺看芍藥詩回首旗亭畫壁時重來已
是十年遲應劉逝後風流盡只有恒河照髣髴一
宮錦千絲費剪裁泥他婪尾殿春杯老顛騰欲相
料理乞取齊奴步障來 雨雨風風態自殊花花
葉葉不會孤更添練鵲和蟬蝶便是徐熙六幅圖
霑濕春衣更不嫌花枝姪姪雨廉纖髣髴禪榻
心情改閒看見童插帽簷

朱至豐臺看芍藥詩昨日慈仁買花歸插滿銅瓶

香徹夜今日豐臺賞花來補茵更坐芳叢下溥溥
朝露猶未晞東風吹過珠還鴛珊瑚成堆玉作盤
殷紅膩白紛低亞晴郊士女如雲屯野老孤亭容
我借南國美人悵望遙賦手空懷鮑與謝適情無
事張華筵曰酒黃雞供村舍帽側狂歌驚四鄰醉
來欲啖崑崙蔗長安貴游盡奢豪雜沓譟猶夢
怕只應此地任棲遲手斧腰鎌遠訕罵

湯右曾豐臺看芍藥詩曉色聰聰錦障開殿春花
事數豐臺天公雨露園公力等是批紅判白來

休嗟狼藉市門前
繞郭栽花萬畝連
當日洛陽全盛日
一枝姚魏直于錢

沈德潛豐臺看芍藥詩
柔枝穠態若爲情
客裡看花眼倍明
略似少陵臨水見
五家合隊麗人行
文牕雕砌付蒼烟
開到名花轉可憐
猶有園丁閒把耒
逢人還訴舊平泉

○韓御史遠風臺在豐宜門外西南四五里宜遷鄉約今豐臺相近

元王惲寒食日韓氏南莊讌集詩
重城鞍馬厭紅塵
春草池塘發興新
自擬嘯歌知道在
不分賓主更精親
青山似喜談時事
白髮空慚滿領巾
默數向來投轄飲
不應驚座獨陳遵

補按今之豐臺疑卽遠風臺之遺址

長元按韓氏係總管通甫判府君美昆仲也所稱南莊卽遠風臺

○葆臺去城南三十里故老相傳金明昌時李妃避暑之臺有寺院甚壯麗乃故京藥師院之支院也今不可考

廣寧門在外城之西門外築石道至盧溝橋有

世宗御製廣寧門外石道碑又

御製重修石道碑

南營外南三守備署在廣寧門外大街

天寧寺在廣寧門外元魏孝文帝建爲光林寺隋爲宏業唐爲天王金爲大萬安明宣德中修之名曰天寧正統中修之名曰萬壽戒壇 本朝乾隆二十一年重修有

御書聯額并御製碑

寺當元末兵火蕩盡文皇在潛邸命所司重修姚廣孝退自慶壽居焉宣德十年改今名

明王綬游天王寺次王時彥韻古寺尋幽竟夕暉
敗垣芳草路依微鳥啼空院僧何在樹老閒庭鶴
自歸靜對方池移石坐高臨孤塔看雲飛平生自
信心無礙不是衰年始息機

尤侗夜投天寧寺宿詩昏黑應須到花宮接雉壕
鐘鳴寒月靜鈴語夜風高千里獨爲客一官何太
勞擔當依淨土破衲補征袍

尤侗再遊天寧寺詩古刹先朝外道場三千精舍
贊公房繡幢翡翠遺宮線寶鼎芙蓉隱御香虛殿
蒼茫搖落日老松寂寞倚寒霜關山百戰多荆棘
處處伽藍似洛陽

徐乾學天寧寺詩籃輿攜伴愜幽懷古寺寒鐘景
色佳開閣青山方滿座入門紅葉已翻堦清談不
厭王濛茗枯坐真同蘇晉齋會向射堂還秉燭知
君不惜酒如淮

禪房不設
酒故云

朱彝尊寓天寧寺詩青豆房容借經旬且閉關日

邊連右輔樹杪豁西山六井泉相似千花塔易攀
不應朝市客翻羨旅人間萬古光林寺相傳拓
跋宮著書非柱下留客卽淹中味坂園蔬甲香携
市酒筒波濤人海濶安坐作漁翁

天寧寺塔高十三尋爲十三級相傳中有舍利隋文帝
建四周綴鐸萬計風定風作音無斷時塔前一幢書
體道美亦開皇中立

王士禎天寧寺觀浮圖詩千載隋皇塔嵯峨俯舊
京相輪雲外見珠網日邊明淨土還朝暮滄田幾

變更何當尋法侶林下話無生

朱熹尊天寧寺大風和徐處士韻檻外開皇塔三千六百鈴天風吹不定一夜枕函聽砌咽寒蟲語
臆搖獨樹形故人眠未穩吟傍佛前燈

考按天寧寺塔倒影之說帝京景物畧較諸說爲明顯今塔頂無珠塔後無大士殿倒影之蹟蓋不可得而考矣

大慈觀音寺又名海會禪林俗名南觀音寺在廣寧門西一里亦白紙坊地也明成化中上林苑監覃盈建

有

聖祖御書額又

世宗御書額并御製碑

普濟堂在廣寧門外迤西二里有

聖祖

世宗御書暨

今上御製碑

柳巷出廣寧門五里土名柳巷村有普濟菴妙智文殊菴皆明嘉靖年建又財神廟 本朝乾隆元年重建

士民祈賽香火甚盛

毛奇齡上巳同王光祿柳巷修禊詩細雨新吹九
陌塵桃花又放曲江春同來柳市傳觴客仍是蘭
亭修禊人 駿馬郊原籠碧絲紅竿挑餞踏花時
如何兩度芳林宴不作王融上巳詩

福生寺在盧溝橋北五里禪各村係舊刹名彌陀菴

本朝康熙間僧元信募修雍正時封禪師號文覺因
勅建以爲退院有

世宗賢

今上御碑其塔院在寺後乾隆十五年莊親王作銘

濕水卽桑乾河至馬陘山爲落馬河出山謂之清泉河
亦曰于泉至雍奴入苒溝謂之合口

濕水又東與洗馬溝合洗馬溝在府西南四十五里
上承薊水西注大湖相傳光武北巡洗馬于此又云
卽鉞期奮戟處

桑乾泉卽濠涓水也其水潛承太原汾陽縣北燕京
山之大池古老相傳有人乘車于池側忽遇大風飄
之于水有人獲其輪于桑乾泉故知二水潛流通注

矣桑乾水自源東南流右爲馬邑川水東南流合濕水桑乾水濕水並受通稱矣

盧溝河舊自宛平縣東經大興縣南至東安武清入白河卽桑乾故道也亦謂黑水水色最濁其急如箭

盧溝橋在廣寧門西南二十五里跨盧溝爲南北往來大道金大定二十九年作明昌三年橋成長二百餘步左右石闌刻獅子數百枚情態各異元明累加修葺本朝康熙三十七年重修

賜名永定河乾隆間設分司管理之又

敕建永定河神祠于盧溝橋側有

御製文勒碑

元至正十四年四月造過街塔于盧溝橋

考按過街塔在西直門外迤西四十里距盧溝橋十餘里今存

金趙秉文盧溝詩河分橋柱如爪蔓路入都門似犬牙落日盧溝溝上柳送人幾度出京華

元楊奐盧溝詩燕姬歌處囀鶯喉燕酒春來滑似油自有五陵年少在平明騎馬過盧溝

明顧起元盧溝橋詩西山籠霧曉蒼蒼一綫桑乾
萬里長最是征夫望鄉處盧溝橋上月如霜

宋舉過盧溝橋詩盧溝橋畔雪霜多今日衝寒又
一過不道鄉心南去急祇疑波浪似黃河

沈德潛過盧溝橋詩桑乾流百折到此激盤渦今
古利名客俱從橋上過風沙揚旦暮鎖鑰壯關河
塵海茫茫際誰人發浩歌

西路同知署在盧溝橋

○符氏雅集亭蓋元人也袁清容謂之酒亭貢雲林謂

之野亭皆有題咏亭在盧溝橋側今不可考

○青菰村及何將軍別業俱無考

元太保劉秉忠墓在盧溝橋北墓前石獸尚存

明姚廣孝春日謁劉太保墓詩芳時登壇謁藏春
兵後松楸化斷薪雲暗平原眠石獸雨荒深隧泣
山神殘碑薛實文章舊異代人傳姓氏新華表不
存歸鶴怨幾多行客淚沾巾

金閣寺在石景山有塔宜遠眺明正德中朱寧營建邀
止幸焉山孤峯特立洞皆鑿石而成

王士禎登石景山浮圖詩浮圖茲山頂峻嶒插孤
標千盤歷詰曲直上凌風颺寒空稍明淨百里見
纖毫茫茫塞上山浩海連波濤渾河盪山來石壁
如動搖咫尺居庸關鳥道迴青霄上谷接雲中設
險非一朝 聖代亭障空九泥罷函穀關門閒落
日土馬無矜驕迴身望漁陽城闕何杳杳薊邱植
汶篁遺烈思燕昭望諸與騎劫智勇皆蓬蒿朔吹
揚驚沙屯雲怒盤鵬慷慨一傷懷覽古心鬱陶逝
將御冷風揮手辭塵囂

惠濟祠在石景山雍正年建以祀永定河神有

御製詩

明林衡署在石景山東南有古松數百株叅錯平野
間蓋先朝果園

碧霞元君廟在石景山明萬歷中董常侍建

西便門在外城之西北隅

白雲觀在西便門外一里元太極觀故墟中塑丘真人
像白晢無須眉都人正月十九日致齋祠下謂之燕
九節 本朝乾隆二十一年五十二年兩次

勅修有

聖祖暨

今上御書聯額并御製碑又真人像前有本鉢一乃刻木瘿爲之上廣下狹可容五斗內塗以金恭刻

皇上御製詩其中石座承之繞以朱欄

長春真人姓丘氏名處機字通密號長春子登州棲霞縣濱都里人金大定丙戌年十九辭親居崑崙山丁亥謁重陽全真開化王真君嘉于寧海請爲弟子戊申召見闕下隨還終南山貞祐乙亥金主召不起

己卯宋遣使來召亦不起是年五月太祖自奈曼國手詔致聘處機與弟子十八人往焉壬午見太祖于雪山之陽拳拳以止殺爲勸問爲治之道則對以敬天愛民爲本問長生久視之道則告以清心寡慾爲要太祖深契其言癸未充東還賜號神仙爵大宗師掌管天下道教甲申八月奉旨居燕京太極觀丁亥五月改太極爲長春七月留頌而逝年八十至元己巳詔贈號長春演道主教真人

真人丘長春能燒金佐世祖軍國之用以功封以金

印主教全真

觀前爲玉歷長春之殿有明碑四右有儒仙殿中塑
赭面黑髯襍頭團花袍玉帶袞補按仙源錄有觀津
張本者正大九年以翰林學士使北見留遂隱于黃
冠居燕長春宮疑卽其人再入爲翕光之殿有明碑
二中列七真像旁繪十八弟子曰趙道堅宋道安尹
志平孫志堅夏志誠何志清張志素李志常基志清
潘得冲孟志穩鄭志修鞠志圓于志可王志明宋得
方張志遠楊志靜皆稱曰宗師又北爲貞寂堂有明
碑二中塑丘真人像二其大者雙瞳點漆精彩如生
非阿尼哥劉鑾輩不能也

元袁桷遊長春宮詩珠宮敞殊界積構中天臺神
清歷倒景青紅隱蓬萊羣山助其雄袞袞從西來
八荒昔禹甸爲此增崔嵬舊邑環蟻垤清泉覆流
杯雲低落日淨莽蒼同飛埃緬懷古仙伯采芝雪
琤璫長春豈酒國殺氣爲之迴天風起高寒玉珮
聲徘徊空餘水中輪歷錄環春雷之人去已久松
聲有餘哀

明朱國祚題白雲觀詩一言止殺古人難多少逋

臣藉爾安辛苦捐軀文信國得歸也擬著黃冠

徐乾學白雲觀詩浮圖寶鐸半空聞仙觀還看榜

白雲霜樹紉園鴉白集岩花丹竈鶴依羣碑鏤仁

壽留千載蹕駐崆峒記數君行樂祇應憑眺徧未

妨徙倚到斜曛

是日遊天寧寺至此

朱彝尊白雲觀詩愛見晴山出郊西萬木踈偶尋

樵子徑因訪羽人居活脫存遺像蒼涼感廢墟惟

餘綵旛字髣髴鶴頭書

世祖興元日真人獨召

丘片言能止殺萬里不虛游羽蛻長春觀池枯木

液流誰裁釋老傳乃與帝師傳

○真常觀長春別院真常李公所創在宮西一里與朝

元閣相直有廢地一區真常構得之版築米施而逝

弟子張誠明繼其志焉

中和潘公長春弟子居燕廣陽坊居人有貨其屋者

公質之以爲長春別館建正殿翼以左右室築琴臺

于殿之陰金有琴二日春雷曰玉振皆在承華殿真

祐之變玉振爲長春所得命公蓄之故以名其臺觀

成以清逸名之潘公自號九峯老人

考按白雲觀西有土阜一未識爲琴臺遺址否清逸觀久廢

○哀忠墓在觀四十餘里相傳唐太宗見隋煬帝征遼所亡士卒骸骨惻然憫之令悉收葬爲一大塚因名○觀西南五六里爲蕭太后運糧河今泯滅不可問矣廣恩寺遼之奉福寺在白雲觀西南地名栗園今土人猶呼爲三教寺遼之石幢浮圖及明碑俱不可考考按遼史南京有栗園蕭韓家奴嘗典之疑卽此

地

崇壽寺土人呼爲鐵獅子廟寺門外鐵獅二趺下有鎮宅獅子字明弘治七年造寺在白雲觀西六里羊坊店有明大學士費宏吏部侍郎溫仁和二碑

普會寺遼之駐蹕寺也在玉河鄉池水村明嘉靖中太監蔡秀恭重建土人呼其地爲蔡公店殿前石幢一書大佛頂尊勝陀羅尼經後題大朝歲次己酉當是金定宗未立國號之時因稱大朝亦未可定殿後一遼時松及松下石幢鏤沙門奉航塔記皆不可考

記稱師諱奉航俗姓李氏涿水新城縣人幼禮燕京
左街駐蹕寺祥玉上人清寧元年受具大安五年提
點涿州惠仁寺壽昌二年提點京北華嚴寺乾統八
年遷化于駐蹕之本院門弟子善堅葬之刻石述師
實行焉

永安寺在玉河鄉明萬歷年建

元星吉墓在玉河鄉以江西行省平章死難明宋濂

撰碑

靜義菴在玉河鄉池水村有磬一識宣武門外竹林寺

此邱惠顯鑄造明景泰四年四月吉日始本是竹林
寺物後人移供于此者

普濟寺在池水村有鐘一明正德五年造

三官廟在池水村有明碑一萬歷己未中書舍人米童
蒙撰

圓通觀在三里河有磬一明萬歷甲午年造

無量菴在三里河有順治十六年重修碑無撰人姓名
碑稱係古刹靈佑觀明正德間剏今爲廣種寺文明
上人別院改額爲無量菴

重興寺 藥王廟皆在三里河無碑碣舊器可考

圓覺禪寺在三里河路北明嘉靖間中涓麥某建 本朝乾隆十六年重修有

聖祖御書額又工部左侍郎董邦達碑寺有鐘樓懸銅鐘一識明嘉靖甲午年五月阜成門外三里河池水村太監麥某造

釣魚臺在三里河西北里許金主游幸處乾隆三十八年濬治成湖以受香山新開引河之水復于下口建閘俾資蓄洩由三里河達阜成門之護城河至東便

門入通惠河有

御書釣魚臺三字并御製詩

釣魚臺在府西花園村臺下有泉涌出匯爲池其水至冬不竭

明公孫詩花石遺墟入戰圖薊門衰草釣臺孤不知艮嶽宮前叟得見南兵入蔡無

宋犖釣魚臺詩欲訪垂綸處長歌鷓鴣來澄波飛野鴨斷岸失孤臺正喜青藤共寧愁畫角催勝游應再續計日牡丹開

吳煜釣魚臺詩金主鑾輿幾度來釣臺高欲比金

臺可憐臺下王飛伯不及鯨魚得奮腮

金人王鬱
隱居釣臺

觀音寺在玉河鄉池水村金大定間比丘智完建明程
敏政重修碑記誤以卽杭州天竺觀音像爲烏珠入
杭徙而北者有

御製訂訛文勒石以正其謬

玉淵潭在府西十里卽玉河鄉元郡人丁氏故池柳堤
環抱景氣蕭爽沙禽水鳥多翔集其間爲游賞佳麗
之所元人游此廣和極一時之盛

明王嘉謨詩玉淵潭上草淒淒百尺泉聲散遠溪
垂柳滿堤山氣暗桃花流水夕陽低

觀音菴在玉河鄉打旋廠有明萬歷四十七年鐘一

關聖廟在高麗莊有明碑一

勝泉寺在高麗莊有明碑一

三義廟在核桃園有明碑一 本朝順治十七年翰林

侍讀馮源濟碑一

碧霞元君廟在核桃園有康熙六十一年編修傅王露
碑

○廣慧寺在玉河鄉朱家莊明成化間因五華寺遺址
修建今已圯

廣濟庵在玉河鄉池水村明天順元年建有金承安五
年四月僧行臻塔幢

太乙集仙觀在京西鄉馮家里元元貞元年以其地畀
純一真人全祐有栗五千株全祐相栗林隙地重
岡環抱下有寒泉旁地衍沃可引灌溉構正殿三楹
翼以兩廡繚以石垣王惲爲之作記大德元年勒石
阜成門在京城西之南

西城副指揮署在阜成門外

夕月壇在阜成門外西郊壇制方東向一成方四丈高
四尺六寸面甃金磚陛四出皆白石各六級方壇周
九十四丈七尺高八尺厚二尺三寸壇正東三門西
南北各一門凡丑辰未戌年

親祭餘遣官每年秋分日祭以西時壇上黃版素書夜
明之神位東向綠版金書

二十八宿之神位周天星辰之神位木火土金水星
之神位俱南向

勞之辨夕月壇陪祀詩冰輪夕曜配朝暎設坎規
模古制存尚白總依商帝色位西仍避太陽尊節
因小盡奠留葉魄待初生桂露痕黍籥列卿空應
象羞將衰髯照銀盆

萬明寺在月壇東有明萬歷間鐘一

慈明寺在南驢市口有明萬歷四年勅建碑

關聖廟在漏澤園有明碑一又 本朝康熙二十九年

中書高聯璧碑

○普濟藥王廟在南路園口已圯有明萬歷間磬一天

啟間鐘一崇禎間大香爐一

○泰山聖母宮在南路園口已圯有明崇禎間香爐一

九天廟在大營鄉院後爲三聖殿有明碑二

報恩寺在甘家口有明碑一

天仙聖母祠在甘家口有明碑一

廣福禪林在甘家口有明天啟間磬一

大悲菴在甘家口有明嘉靖間鐘一

寶塔寺殿前有塔高二丈餘計五層皆六面每面刻佛
像有明正統十一年賜禮部劄付碑初名宰塔後改

今名

慈悲院在阜成門西關大街乾隆二十八年潭柘僧募建爲收養老稚廢疾之所

衍法寺在阜成門外大路北有明正德七年大學士李東陽碑吏部尚書楊一清碑後殿有鐘一鑄遼尊勝陀羅尼幢記字又施食幢上刻神像皆乾隆三十六年寺僧掘得者

○資福寺明正德間僧圓昇建土人呼卧佛寺已圯廢今西直門大街迤南有寺數椽亦名資福乃寺僧移樓于此而仍舊名有香爐一曰資福永遠供奉明萬歷丙子鑄

慈悲寺去阜成門二里明萬歷壬寅蜀僧愚菴建本朝乾隆二十二年奉

勅重修有御書額

寺中旃檀金像乃黃太史輝手白撥蠟精工特甚寺碑陶太史望齡撰黃太史書丹外有蜘蛛塔碑甘井碑金剛塔碑皆黃書並稱能品

○靜樂堂在慈悲寺後二里皆葬宮人處所謂宮人斜

查嗣瑮詩銅符抵玉魚并冷胭脂澁不及景陽宮
生共君王入 蜘蛛塔繞虎皮牆老樹山門盡白
楊夜半宮人斜上月冷隨環珮禮空王

永隆寺在阜成關外金源時建初名地藏寺明正統間
重修改永隆禪寺在香山鄉又名漏澤園

西域寺在阜成關外馬家溝俗呼三塔寺明宣德年建
爲灌頂廣善西天佛子大國師茶毘之所其大弟子
烏巴廸呢雅寶哩等建灰塔立寺告成之日賜名西
域

嘉興觀在阜成門稍北而西北通白石橋

歐邏巴修士利瑪竇墳在白石橋西

○明太傅惠安伯張公園在嘉興觀之右牡丹芍藥各
數百畝花時主人制小竹兜供遊客行花塍中

查嗣瑮詩花塍迢遞竹兜過百頃張園似錦窩四
十餘年筋力盡主人看少客看多

慈壽寺去阜成門八里明神宗爲慈聖太后建成于萬
歷六年殿宇壯麗左有永安壽塔丁三級聳出雲漢
四壁金剛像如生 本朝乾隆二十二年

敕重修有御書額舊有明大學士張居正碑又閣臣申時行許國王錫爵瑞蓮賦勒碑寺左

九蓮菩薩者孝定皇后夢中授經者也賢而一字不遺因錄入大藏中旋在慈壽寺殿後建九蓮閣內塑菩薩像跨一鳳而九首寺僧相傳菩薩卽孝定前身

也今寺內香雲閣下東偏供像一尊高尺雲有跼鳳九首之形

明陳萬言慈壽寺詩帝城門外刹舍衛國中臺初地三摩入慈宮萬壽開午鐘招雉雀夜雨積莓苔怪底花間客浮名逐夢來

王王禎登九蓮閣詩憑闌試騁望遠近一塞林不見西山色蒼茫雲外深

摩訶菴在慈壽寺傍明嘉靖丙午中官趙政建菴不甚大潔淨特甚前後多松檜四隅各有高樓疊石爲之登樓一望川原如繡西山蒼翠欲與人衣袂接萬歷後菴中杏花多至千餘遊人最甚

天啟中樓爲魏奄所毀

摩訶菴東偏金剛殿有明人重臨三十二體金剛經石刻

考按金剛經集纂三十二體石刻每經一章爲一

體每體標以分書附以釋文明陳萬言及 本朝

王崇簡有跋

王士禎游摩訶菴詩西院枕廻溪青山滿高閣祇
園天氣佳苔砌餘紅藥鳥如迦陵響梵是魚山作
微雨急來過紛紛幾花落 東院更幽絕蒼苔引
深處修篁蔽簾櫳風聲在高樹恍惚思舊遊繾綣
未能去誰賦洞庭詩清如扞山句

高士奇摩訶菴看杏花詩青郊路轉見芳菲日暖
園林燕子飛別圃乍經山杏落僧厨新煮藥苗肥
繁花舞蝶迎人面細草輕烟上客衣更向層臺高
處望千峯螺黛送春暉

法藏菴在摩訶菴右又名永慶禪林爲摩訶別院

明馮琦宿法藏菴詩妙諦聞龍藏清談過虎谿更
從雙樹杪借我一枝棲法界心常淨名琴手自携

曲終人境寂殘月竹房西

菴僧無
鉉善琴

元福宮在摩訶菴西明正德五年建中有蒼松四株最
奇古後殿三清六真像皆範銅爲之配殿文昌與太
侍童子亦銅像旁鑄一騾銅質光潤絕似宣德鎏金

薰爐色有崇禎間中書袁志學碑

宋肇自慈壽寺過元福宮詩鄰寺看碑入仙居載
酒行荒涼前代蹟憑弔此時情塔院饑颺鼠丹房
野蕨生松陰留小憩格磔暮禽鳴

查慎行元福宮詩出屋間遠籟入門走長松粘天
百頃濤下有掉尾龍長養紀何朝云自明武宗廻
鞭促斜照紫翠凝西峯

慈育院在十里莊舊稱碧霞元君廟康熙四十六年
敕重修有御書聯額

報誠寺在十里莊平邊店寺門額識正德戊寅年蓋亦
明所建也

靈感觀音菴 寶華菴皆在田村

顯應寺在阜成關外香山鄉黃村康熙五十八年因保
明寺舊基修建有

御書聯額并清漢字碑

西黃村保明寺是比丘尼焚修之所寺建自呂姑明
正統間姑諫阻北征不聽復辟後念之封爲御妹建
寺賜額藏天順手敕三道有寺人司戶俗呼皇姑寺

王士禎皇姑寺詩皇姑寺前風日晴畏吾村畔草
痕生山桃堤柳自春色粥鼓鐘魚非世情鐵券南
宮憐將相黃沙北狩誤公卿獨慙叩馬輸巾幘天
市星文幾夜明

宋肇皇姑寺詩叩馬名高巾幘中斜陽幽寺帶芳
叢黃沙翠輦當時恨畫幔雲旗異代崇流水若教
能納諫奪門笑事更論功妻凉尼子迎神曲不少
人間烈士風

雙林寺明萬歷初大璫馮保營葬地造寺曰雙林雙林

馮之別字也後西竺南印度僧足克戡古爾居之賜
名西域雙林寺

足克戡古爾西竺南印土人萬歷四年東入中國初
息天寧寺後過阜成門外二里溝見一松盤覆趺坐
其下默持陀羅尼咒匝月不食僧耳環手鉢紅罽衣
蒼紫面而髯鬚有古達摩相長侍畢某奏之賜織金
禪衣爲建寺曰西域雙林寺殿供三大士西番變相
也寺後一土山山前一塔傍多朱櫻

葉映榴雙林禪院觀荷詩勝侶尋幽剎芳筵對水

張宿紅窺鏡影高翠捧珠光雨後人尤愛觴傳我
亦狂相看塵土氣俱付碧雲鄉

湯右曾過雙林寺詩高柳鳴蟬已到門小橋雨壞
晝昏昏茶香一勺知新味鴻爪何年識舊痕年落
槐花秋夢冷自翻荷葉午風喧痴人未用痴相惜
寶帶華纓一笑論

長元按足克戡古爾入中國之時正焉瑄建寺之
時其後焉敗而寺存因以居之賜名西域雙林寺
增設西番變相非特建也六研齋筆記載番僧鎖

喃襲結自述云初至中國住五臺山羅喉寺二年
遇太監劉潤引至北京雙林寺萬歷三十年五月

敕奉明肅皇太后命住萬壽庵持咒

卽萬壽寺

三年有

番經廠太監張貴奏于御前令引見命住雙林寺
設壇濟幽四十九晝夜賜紫衣寶冠命西經廠掌
壇教授中貴云云其敘甚詳帝京景物畧所載多
傳聞之誤也

興教寺在雙林寺東明成化中建以居大興法王結
幹領占者

長元按銷喃嚶結云先代和尚班的荅祖乃成化
皇帝國師歿于東土賜法王寶殿塔院

神虎橋在雙林寺西二里橋有四石虎明萬歷中一虎
夜逸遂名三虎橋

查慎行三虎橋詩狼石怒趁人風聲挾秋雨馬驚
左右顧橋滑路難取誰呼北平守三發三飲羽我
欲從之游入山射真虎

宸垣識畧卷十三

宸垣識畧卷十四

仁和吳長元太初氏輯

郊坰三

西直門在京城西之北門外修石道二十里至 圓明
園

王士禎城西詩都城負太行勃碣地形古城西富
流水磬折頗參伍裂帛憺渟著淵淵乃句矩北土
青龍橋雲峰燦可數皎如奩中鏡曉牕照眉嫵南
過金口寺徧地鵝王乳錦石映文魚白蘋間紅荏

吾家魯連陂簑笠渺烟浦小別二十年稻塍幾風雨安得半尺筴行歌輟水牯

南營外南一守備署在西直門外西關

高粱河在西直門外半里爲玉河下游玉泉山諸水注焉高粱其舊名也自高粱橋以上謂之長河

濕水又東南高粱之水注焉水出薊城西北平地泉東注經燕王陵北又東經薊城北又東南流入濕水俗諺云高粱無上源清泉無下尾蓋以其源散漫難尋故也

長元按魏征南將軍劉靖碑云高粱河水出自并州黃河之別源侯立過于水道高粱河造戾陵遇開車箱渠水流乘車箱自薊西北逕昌平東盡漁陽潞縣所潤合四五百里灌田萬有餘頃是水經注所云水出薊城西北乃車箱渠之下流而非高粱河之本源也又碑在大城東門內道左則魏晉時幽州城郭在今京城之西北可以概見

○齊園在西直門稍右園盡則高粱橋矣園中有板橋叢竹海棠甚多

高粱橋西直門外石道轉北有坊二南坊曰長源永澤北坊曰廣潤資安
過橋爲

倚虹堂由此溯長河爲

樂善園

詳苑

明朱茂昉清明日過高粱橋詩高粱河水碧灣環
半入春城半繞山風柳易斜搖酒幔岸花不斷接
禪關 看場壓處掉都盧走馬跳丸何事無那得
丹青尋好手清明別寫上河圖

王士禎小憩高粱橋詩昔日高粱道綺羅嬌上春

依然挑菜渚不見採蘭人新水生魚鱗輕絲漾麴
塵不妨成漫興青草正如茵

高粱閘在西直門外迤北一里元至元二十九年建名
西城閘

水從玉泉來三十里至橋下夾岸高柳絲垂到水綠
樹紺宇酒旗亭臺廣畝小池蔭爽交匝歲清明日都
人踏青游者以萬計浴佛日重午日游亦如之

○巡河廠在高粱橋稍西門外臨流諸山濃黛涵浴水
光中都人多于此游觀

廣通寺在巡河廠北元之法王寺也亦春游勝地有聖祖御書并御製碑

慈獻寺在廣通寺西係明舊刹乾隆間重修有

御書額

極樂寺去高粱橋三里明成化中建門外有二柳高拂天長條踈地可掃馬蹄中有松亦佳成化中寺內牡丹最盛春日游騎恒滿寺東有雨花亭西爲通霞觀有老栢四株兩人抱之不能合也

圓明園千總署在水磨村

大佛寺在西直門北三里香山鄉畏吾村明正德中太監張雄建賜額曰大慧并護勅勒于碑寺有大悲殿重簷架之范銅爲佛像高五丈土人呼爲大佛寺嘉靖中太監麥口於其左增佑聖觀後山蓋真武祠時世宗好道寺藉此以存有大學士李東陽李本禮部尚書王錫爵碑記 本朝乾隆二十二年重修有御書額

長元按嘉靖中御用監麥福掌團營當卽其人

○明大學士李東陽墓在畏吾村今無考

查嗣琛畏吾村詩村童擔上沙丞相墓前石惟有
宮中鴉飛來弔寒食

大真覺寺在極樂寺西明永樂時西域中印土僧板的
達來貢金佛五軀金剛寶座規式詔封大國師建寺
居之成化九年詔寺中準中印土式建寶座累石臺
五丈藏級于壁左右蝸旋而上頂爲平臺列塔五各
二丈塔刻梵字梵寶梵華 本朝乾隆二十六年重
修有

御書聯額并御製碑

白石橋在西直門西里許有明萬駙馬白石莊臺樹古
本爲附郭園亭第一

明劉榮嗣白石莊詩仙圃宜秋色相將戀夕曛松
青新濯雨槐古舊侵雲竹牖池光合山亭石翠分
鳳簫遺韻在擬向月中聞

朝真觀在白石橋西 本朝康熙三十三年重修有太
常少卿勵杜訥碑

○延慶寺在朝真觀西

長元按燕都游覽志有延壽菴在白石橋西二里

殿宇精嚴疑卽延慶寺

○元歐陽原功墓 李孟墓俱在香山鄉石井村

廣源閘在西直門西七里元至元二十六年建 本朝
頻加修葺于此易舟入昆明湖達繡漪橋至 清漪
園

萬壽寺在廣源閘西數十武明萬歷五年建殿宇極其
宏麗左鐘樓前臨大道鐘鑄自永樂徑長丈二內外
刻佛號彌陀法華諸品經蒲牢刻楞嚴咒銅質精好
字畫整雋相傳沈度筆少師姚恭靖公監造名曰華
嚴鐘擊之聲聞數十里有敕建碑大學士張居正撰
後鐘棄于荒地 本朝乾隆十六年移鐘于城北覺
生寺有

御製碑清漢蒙古西番四體書

明朱國祚萬壽寺詩貝葉三車少華鐘萬石餘聲
仍到長樂地合置精廬瀟灑人王界莊嚴學士詩
秋來霜落後流響更何如

萬壽街在萬壽寺西路北設關門有長衢列肆北達
暢春園居人稱爲蘇州街

魏之琇詩樓館青紅百貨俱水郵山郭似姑蘇小
人近市真堪羨翻作人間大隱圖

昌運宮在廣源間之南三虎橋西里許初名混元靈應
宮明正德六年司禮太監張永建有敕建碑又大學
士李東陽副使劉效祖碑二本朝乾隆三十四年
敕修有御書并御製詩碑清漢各一

查慎行昌運宮詩老鸛巢古枝虛廊交冷翠妻凉
前代塚傳是張常侍煌煌元老文苔蝕仆碑字賜
域滿西山斯人或無愧

興勝庵在昌運宮西明萬歷中建土人目爲松林今松
無復存矣

查慎行興勝庵看杏花詩幸是韶光處處同勝遊

隨意轉芳叢

先經摩訶菴不得入

別開香界松林外遙指烟

村杏社東黛色濃添三面綠日痕微減一分紅只
須十步變丹閣多少花頭在下風 及記當時載
酒遊舊題幾壁拂塵留重隨客到僧猶識不待人
言我欲愁牧笛聲中芳草路鞭絲影裏夕陽樓花
開花謝年年事豈料傷春易白頭

中營副將署在海淀

暢春園守備署在海淀莊

三笑菴在萬壽寺西過此爲麥莊橋相傳明代舊刹

本朝重加修葺有

御製碑并御製詩

廣仁宮碧霞元君廟名藍靛廠在麥莊橋之西長春橋

俗呼西頂有

聖祖御製碑又

今上御書聯額并御製詩碑

關聖廟在廣仁宮東乾隆二十一年

敕修

自怡園在海淀大學士明珠別墅

查慎行過相國明公園亭詩名園多在苑東偏不

數樊川及朝川綺陌東西雲作障畫橋南北草含

烟鑿開邱壑藏魚鳥勾勒風光入管絃何似贊皇

行樂地手栽花木記平泉毬塲車埒互相通門

徑寬閒五百弓但覺樓臺隨處湧不知風月與人

同紫駝卧草平沙外白馬穿花細雨中一片近郊

農牧地可容雞犬識新豐

巴溝村有巴溝橋東南與萬泉莊接壤其水自南而北
匯入 暢春園爲丹稜沆卽 宮門前之南菱池也
其源自萬泉莊來有

御製碑

高粱橋西北十里平地有泉四出瀦爲小溪凡數十
處北爲北海淀南爲南海淀北海之水來自巴溝或
云巴溝卽南海淀也有石梁一是曰西勾巴溝之旁
有水從青龍橋河東南流入子淀南五里爲丹稜沆

又南爲陂五六出于巴溝達白石橋與高粱水合

長元按明王嘉謨薊邱集云沆水再瀦爲溪有村
曰東雉水入地中出于巴溝自溝達于白石以入
于高粱是丹稜沆之水未嘗明與巴溝通也且丹
稜沆三字見自元碑未知所始故土人不知其名
伏讀

御製碑云園前有水一溪俗稱菱角泡子疑卽所謂丹
稜沆也其水山南而北不與巴溝通可證孫朱二
書之誤

明朱國祚西勾橋詩東雉村邊水西勾橋下流濯
纓人不至處處浴沙鷗

王士禎竹枝詞西勾橋上月初升西勾橋下水澄
澄綺石迴廊都不見遊人還問米家燈

暢春園卽明李武清侯清華園

詳苑園

清華園明李戚畹別業臨丹稜沈園廣十里正中泚
海棠堂北亭置清雅二字明肅太后手書也園中牡
丹多異種以綠蝴蝶爲最開時足稱花海西北水中
起高樓五楹樓上復起一臺俯瞰王泉諸勝

清華園前後重湖一望漾渺在都下爲名園第一若
以水論江淮以北亦當第一也

明袁中道海淀集李園詩滿目塵沙塞路谿夢魂
久已憶山棲誰知烟水靑溪曲只在天都紫陌西
鎮日浮舟穿柳澗有時騎馬出花畦到來賓主紛
相失總是仙源路易迷

洪雅園卽明米萬鍾勺園今爲鄭親王邸第

勺園在北淀明水曹郎米仲昭別業又曰風烟里中
有曰色空天曰太一葉曰松垞曰翠葆榭曰林於蒨

廬山詩集
鄱人稱曰米家園仲詔繪園中景爲燈邱壑亭臺纖
悉具備都人又稱爲米家燈

明王思任題勺園詩纔辭帝里入風烟處處亭臺
鏡裏天夢到江南深樹底吳兒歌板放秋船

查嗣璫雜咏詩東雉西勾地較寬米園絕有好林
巒只因身住風烟里畫個朝參一笑看

泉宗廟在丹棱沆南萬泉莊乾隆三十二年建正殿供
龍神像後爲樞光閣上祀真武下供龍王龍母像有
御書聯額并御製碑御製詩

一廟東所內院中正宇三間稍南爲曙光樓山後敞室
爲挹源書屋右有六方亭南爲觀瀾亭北爲扇淳室
東爲向綠軒北爲至善堂堂西爲秀舉樓 至善堂
北爲湛虛樓 樞光閣右廊而西曰依綠軒軒南爲
蟬淵榭東接樂清館 榭之南建石坊二架以石橋
橋外稍東曰津逮亭 樂清館之南爲碑亭西南宇
曰愛景庭後爲集遠堂 館西爲苑之西罍門

考按廟內外淙泉之處

皇上各錫嘉名立碣以志其在廟門之外者凡三南曰

大沙泉小沙泉北曰沸泉廟內東所廳宇對岸曰
漉泉屑金泉曙光樓後曰冰壺泉金澗泉規泉山
後度紅橋曰露華泉鑑空泉印月泉觀瀾亭畔曰
藕泉躍魚泉松風泉扇淳室後曰晴碧泉白榆泉
向綠軒畔曰桃花泉主善堂之西曰琴脈泉秀舉
樓之右曰杏泉澹泉再南曰瀏泉樞光閣東配殿
南曰洗鉢泉西所依綠軒右曰浣花泉蟬淵榭之
南曰漱石泉橋畔曰乳花泉漪竹泉柳泉楓泉雲
津泉樂清館之南方池曰月泉西曰貫珠泉凡二
十有八皆

御書勒石

長元按 懋勤殿底冊門外立碣五大沙泉小沙
泉沸泉月泉巴溝門內立碣二十八有荷帶泉其
餘同今門內訛荷帶泉爲月泉門外少月泉巴溝
二碣未知孰誤

三教菴在萬泉莊有

御製萬泉莊碑

延壽菴在巴溝村

永寧寺在 暢春園西北門內後殿供十六羅漢寺門外爲崇臺臺後爲船塢有

聖祖暨

今上御書聯額

聖化寺在 暢春園小西廠之南門外二里許門殿凡五層有

聖祖暨

今上御書聯額

山門外度東闌橋迤西爲北所內 正殿額曰青翠

霄漢西院正宇額曰和風霽月中虛靜齋宮門內額曰怡庭柯臨河額爲欣稼亭自北所東橋轉西宮門內 正殿爲含淳堂後殿爲佛樓右臨池樓後爲得真齋西爲帶昌亭東爲翠軒爲仙楹樓東爲湛凝齋爲敷嘉室仙楹之東爲襟嵐書屋稍南循廊而西爲礪岩又南敞宇曰泉石且娛心

長元按泉宗廟聖化寺舊聞考俱入苑囿但在丹稜沆之南非若香山寺在靜宜內垣可比故以名勝側改入郊垌

永通寺在南海淀前明舊刹也 本朝康熙間重修

聖祖御書清梵寺額有

世祖御書又

今上頒賜藏經全部

龍翔寺在馬家口前明舊刹 本朝康熙間重修有

聖祖暨

世宗御書聯額

覺生寺在曾家莊雍正十一年建乾隆間移明永樂時
華嚴鐘懸于寺內有

世宗御製碑又

今上御書并御製詩勒碑陰

沈德潛覺生寺大鐘歌牙角鬚鬚蟠老龍色相古
黝兼青紅旋蟲躩踞列衆獸旁羅鬼怪諸姦凶重
逾萬石更萬石漢高廟器將母同金泥傳自明永
樂遷都北地仍燕封廟社既建鼎呂定次及梵宇
成華鐘道衍監造役鳧氏數倍仙掌鎔金銅彌陀
華嚴舊全部沈學士庚筆藏稜鋒懸之傑閣人雲
表六僧舉杵齊撞春當年燕飛啄孺子南兵百萬

爲沙蟲抄連瓜蔓凝碧血旣延赤族鋤羣忠憑仗
佛力消黑業趲趲聲徹天門重恒河沙數至無算
火燄滅熄刀輪空從來王者貴不殺豈緣象教尊
禪宗神孫更創萬壽寺大璫勢力移其中熹宗以
後委諸地龍卧沙草雲難從 熙朝郭西建寶刹
重樓複殿棟宇隆錫名覺生代木鐸警醒憤憤憐
愚蒙鐘從廢寺徙新摘萬牛回首駢徒工鯨鏗鼉
鳴整課誦響達長樂隨天風我來郊原訪林麓一
徑委折趨靈宮諦听古蹟决雙背偉觀一豁平生

胸因思雞鳴埭西北巨鐘蝕土眠蒿蓬摩挲永樂
二年鑄兩地禱福邀天功一鐘淪棄聲久啞一鐘
叩擊驚頑聾滿年亦等遇不遇何況土類分雌雄
獨惜大鋪置佛地虛無祇伴金仙蹤 今皇崇道
講經學鴻都觀禮來耆童始終條理藉法物曷不
輦載歸辟廱於論於樂頌 聖德相和鼙鼓聲逢
逢

藥王廟在小泥窪乾隆三十七年重修
紫竹林碧霞宮在陳府村係舊剎羽士居之 本朝康

熙間重修

度紅橋而北爲

圓明園

詳苑園

中營都司署駐 圓明園

前湖在 圓明園前乾隆間所開有

御製詩碑

南海淀迤北是爲 暢春園紅橋河水從 暢春園

西北門五空閒流出垣外在 圓明園宮門之南迤

邐東注稍折而北流經 長春園大東門外石橋合

御園諸水趨清河會沙河以入白河

慧福寺在 圓明園宮門左舊名清芳菴雍正元年建

世宗賜今額

善緣菴在 圓明園左係舊刹

泰山聖母廟在善緣菴右康熙年建

澄懷園在海淀大學士張廷玉 賜園繼大學士劉統

勳居之燬于火後爲 內廷翰林公寓

沈德潛遊澄懷園詩名園水木互潏洄地近 離

宮絕點埃虞褚並官親禁掖鄒枚分宅住樓臺荷

風入座香難散鷗侶依人夢不猜行到苑牆遙指
點此間合號小蓬萊

大樹菴在華家屯舊有前後兩菴康熙間重修

聖祖御書額曰勅建大樹菴

觀音菴在大樹菴西康熙年建

蕭家河橋在 圓明園西北門外舊有閘今仍其制其

水由青龍橋來東北流繞 圓明園後約三里許至

車房村合紅橋河

長春園

詳苑圖

大東門外大石橋有關帝廟西北里許地

名二河間亦有關帝廟大北門前營有三聖菴皆

本朝建立

法慧寺在 長春園東北門殿二層有

御書額

圓明園守備署在掛甲屯西胡同

安河橋南有豐益倉有三官廟乾隆二十九年建其碑

畧云左遶長河右列金山

長元按豐益倉雍正年建 圓明園所駐西四旗

及健銳營兵精俱于此支領

圓明園樹村守備在樹村南

泰山聖母廟在達官郵明天啟四年建 觀音菴乾隆

五年建俗稱將軍廟以殿內觀音大士像左右有右
像二刻爲將軍侍立之形也

大有莊在達官郵西南里許莊前爲 御道

昆明湖卽西湖景爲玉泉龍泉所潄此地最窪受諸泉
之委滙爲巨浸土名大泊湖環十里乾隆癸亥 命
流濬開拓周四十里西山泉脈隨地涌現因勢順導
流注于湖其自西北來者尙有二源一出于十方音

覺寺旁之水源頭一出于碧雲寺內石泉又開洩水
河二自靜明園土山外爲東北一帶洩水河其水東
北合蕭家河諸水歸清河自四王府土山外爲西南
一帶洩水河其水經小屯村折而南經雙槐樹之東
又東南至八里莊滙于釣魚臺前湖內爲正陽廣寧
廣渠三門城河之上流皆乾隆間開濬

賜名昆明湖堤上有廓如亭亭北爲崑崙石勒

御製詩其旁範銅爲牛背鐫

御製金牛銘又

御製萬壽山昆明湖記勒石 清漪園

西湖方十餘里有山趾其崖曰甕山寺曰圓靜寺左
田右湖又三里爲功德寺洪波衍其東幽林出其南
路盡叢薄始達于野乃有玉泉出于山下歛薄轉激
散爲谿池池上有亭宣宗駐蹕處也又一里爲華嚴
寺有洞三其南爲呂公洞一竅深黑投以石有水聲
莫有窮之者

水從高粱橋而西傍有極樂真覺諸寺臨之前廣源
閘節之上麥莊橋越之過橋爲湖界以長堤湖在堤
南稻田豆場在堤北曰西堤者城西堤也堤行八九
里龍王廟廟之旁黑龍潭又行一里堤盡右有村上
青龍橋卽玉泉山下也

明王直西湖詩玉泉東滙浸平沙八月芙蓉尚有
花曲島下通蛟女室晴波深映梵王家常時鳬雁
聞清唱舊日魚龍識翠華堤下連雲杭稻熟江南
風物未宜誇

明馬汝驥西湖詩珠林翠閣倚長湖倒映西山入
畫圖若得輕舟泛明月風流還似剡溪無

王士禎西隄詩隄外春流界稻田隄邊鷗鷺爭娟
娟風烟里畔千條柳十里清陰到玉泉 萬樹垂
楊掃綠苔桃花深映榭籬開遊人盡說西堤好須
及清明上巳來

沈德潛西湖堤散步詩左帶平田右帶湖晴虹一
路繞菰蒲波間柳影疎兼密雲際山容有忽無遺
臭豐碑舊閣賢前紫古寺老浮屠閒遊宛似蘇堤
畔欲向橋邊問酒鑪

大承天護聖寺元天歷二年建在西湖盡處近金山口

規制鉅麗明改爲功德寺 本朝乾隆間重修有
御書額并御製碑

功德寺舊名護聖前有古臺二相傳元主游樂更衣
處或曰此看花釣魚臺也寺極壯麗立穹碑二其一
宣廟御製其一元舊物蒙古字有毘盧閣崇數仞凭
闌兩眺一寺之勝皆在目前

寺初興時板菴禪師能役木毬毬大如斗不脛而走
逢人躍地如叩首狀入侯門戚里募金人目爲木毬
使者所募金錢以建巨刹其毬至今尚存

長元按元史至順二年築駐蹕臺于承天護聖寺
東則寺內古臺乃駐蹕臺與看花釣魚爲三耳
明程敏政功德寺詩東風幾日到郊垌岸草汀蒲
已白青羈客年來無暇日野人相見亦忘形湖當
鷺嶺烟光重路入龍潭水氣腥聞說先皇曾駐蹕
紅雲猶繞玉泉亭

查慎行廢功德寺詩瓦落空牆土盡崩雜耕猶剩
兩三僧晨參怕子留禪侶夜看松花照鬼燈駐蹕
亭邊牛飼草釣魚臺畔鼠攀藤木毬斗大今安用

自古琳宮有廢興

查嗣璫雜咏詩刻絲秘像錐金柱虎口開時古殿
崩事去木毬稽首懶更誰乞米救殘僧

明景帝陵在金山口今封樹如故有

御製詩碑

朱彝尊謁景皇陵詩重湖裂帛已流澌岸柳三眠
又一時尚有寢園開夕照每逢人日撫殘碑童童
獨樹棲禽少冉冉長途下馬誰回首昌平山近遠
裕陵松栢總淒其

甕山在京城西三十里玉泉之東西湖當其前金山拱

其後乾隆十六年

賜名萬壽山山前爲

清漪園

詳苑園

甕山在海淀西五里土色純盧其南岩若洞而圯者
一樵人曰此少昂仙室也人家傍山小具池亭桔槔
鋤犁咸置垣下酷似江南風景

甕山相傳有老父鑿石甕上有華蟲雕刻文中有物
數十種悉爲老父携去置甕于山之西留識曰石甕
徙貧帝里嘉靖初甕不知所在嗣是物力漸耗

朱彝尊甕山詩石甕久已徙青山仍舊名去都無
一舍已覺旅塵清

查嗣瑤雜咏詩少昂仙家久結隣帝城佳氣有金
銀誰移寶甕他山去從遣三街九市貧

大報恩延壽寺在甕山下明圓靜寺舊址 本朝乾隆
十五年于其地復建門殿凡五層皆

御書額并御製碑又御製詩勒碑陰西爲羅漢堂倣杭
州淨慈寺田字式建內分甲乙十道塑阿羅漢五百
尊皆

御書額

圓靜寺弘治七年助聖夫人羅氏建因岩而構甃爲
石磴游者拾級而上山頂有屋曰雪洞俯視湖曲平
田遠村綿亘無際

元丞相耶律楚材墓在萬壽山南麓數百武好山園之
東乾隆十五年

命立祠宇有御製詩碑

耶律楚材墓前祠以廢諸石獸俱零落一翁仲立而
未仆天啟七年夏夜有螢千百集翁仲首上人望見

譁曰石人眼光也質明共踣而碎之

甕山下耶律丞相祠崇禎中尚存公及夫人二石像
端坐陌頭公像鬚分三縷其長過膝

明王嘉謨耶律丞相墓詩丞相遺邱湖水陰荒榛
野草自蕭森亭前瀑布搖空穴雪後寒禽啁大林
慘愴尙思戎馬日艱難深仗哲人心雲龍鵝鶴真
餘事獨弔空山淚滿襟

王士禎詩石甕山頭歸片雲望湖亭上倚斜曛紙
錢社酒棠梨道誰到湖邊耶律墳

查嗣琛雜咏詩隨身短鐻埋何用
誓墓殘碑枉瘞銘丞相頭顱曾出土
莫教翁仲怨流螢

圓明園把總署在甕山東北

須彌靈境在萬壽山北長橋南後爲香岩宗印之閣閣東爲善現寺西爲雲會寺

萬壽山後溪河亦發源于玉泉白玉河東流經柳橋曲折東注其出水分爲三一由東北門西垣下閘口出並歸圓明園西垣外河一由惠山園南流出垣下爲官門前河又南流由東堤外河會馬廠諸水入

圓明園內爲昆明湖

宮門前河東西爲長堤其西南爲養水湖東堤之北爲文昌閣南爲廓如亭亭西爲長橋又南爲繡漪橋廓如亭西度長橋爲廣潤祠繡漪橋北湖中圓島上爲鳳凰墩西堤之北爲柳橋桑苧橋玉帶橋稍南爲鏡橋練橋界湖橋湖北岸爲蠶神廟北爲織染局後爲水村居自此西接玉泉

青龍橋在甕山北五里元明白浮堰之上流也其西通金山口其北斜界百望山有

御製詩其闢之製今仍其舊東半里許設城關有

御書額

七里泊在碾莊源自昌平州東南流至宛平縣合高梁青龍橋跨其上

查慎行青龍橋詩甕山西北巴溝上指點平橋接碾莊自甕清渠成石碣盡迴流水入宮牆殘荷落瓣魚鱗活高柳飄絲鷺頂涼不礙蹇驢行蹇蹇有人緩轡正恩鄉

慈恩寺在青龍橋側明萬歷中勅建寺東有塔院

○西方菴在青龍橋南里許東望據湖梵宇雖不雄偉而極精嚴稍南爲三元寺甚隘而頗饒水木之勝

紅石山有妙應寺關帝廟皆明建 本朝重修

妙應寺後有碣房全座并亭一碣房之下爲山神廟

寶藏寺明正統間建 本朝重修

過金山口數里有谷頗幽遂上坡三里許度大壑又三里許是爲寶藏寺正統四年係西域僧道深建初名蒼雪菴勅賜今額

畫眉山由金山口度嶺至冷泉村泰州務後產石黑色

浮質而賦理入金宮爲眉石故名

黑龍潭在畫眉山有龍神廟祈禱雨澤甚爲靈應有

世宗御製碑又

今上御製詩勒石

山上龍湫圍廣十畝水從石罅中出下溢田間潺潺
有聲山北十里有溫泉

玉泉山在舊山北青龍橋西金章宗建行宮于此元明
以來皆爲游幸之所 本朝康熙間修葺

聖祖賜名靜明園

詳苑圖

玉泉山以泉名泉出石罅瀦爲池廣三丈許水清而
碧細石流沙綠藻紫荇一一可辨池東跨小石梁水
經橋下東流入西湖山頂有金行宮芙蓉殿故址相
傳章宗嘗避暑于此

玉泉山土紋隱起作蒼龍鱗沙痕石隙隨地皆泉山
陽有巨穴泉歛而上淙淙有聲或名之噴雪泉有

御書玉泉趵突四字爲燕京八景之一

碑在靜明園

元王惲游玉泉詩峰頭亂石鬬嵯峨水底浮光浸
碧霞絕似蘇門山下路惜無修竹與梅花

明劉大夏玉泉道中詩晚來聯騎踏晴沙風景蒼
蒼一望遐幾處白雲前代寺數村流水野人家鶯
啼別墅春猶在馬到西山日未斜回首不知歸路
遠九重宮殿隔烟霞

王士禎玉泉詩蕭晨金山下濯纓玉泉水十畝清
瑤流分明鏡相似金膏時掩映碧玉相傾委水荇
隨風翻靡靡映清泚垂楊夾碕岸其下多芳芷流
爲裂帛湖宛若昆明裏湖上多漁村網罟集沙尾
宣宗昔遊幸龍舸茲山趾當年功德寺荒涼嘯山
鬼何況芙蓉殿遺蹟皆銷毀碧水自東流彌傷人
代駛儻逐五湖舟去問鴟夷子

宋犖玉泉詩清泉噴薄散驪珠咫尺流爲裂帛湖
常送寒淙穿大內新開水殿倣三吳烟霞窟宅天
留勝楊柳汀洲畫不殊蓀蓀恩波閒極目願同黃
鵠一濡濡

龍王廟在玉泉山麓廟據泉上渟泓方廣數丈湧泉如
珠名裂帛湖然山旁石縫皆迸流濺雪不特此湖也
裂帛湖泉源仰射如珠串古榆蔭潭上極幽秀過趙家

堤水更深碧

王士禎裂帛湖詩裂帛湖光碧玉環人家終日映
潺湲分明一幅葵侯紙寫出湖南千萬山

朱彝尊詩裂帛湖流兩岸平柳陰風暖燕飛輕年
光含笑長安客開遍山桃不出城

查嗣璫裂帛湖詩石迸珠光碎風磨鏡面平若教
褒姒聽應愛此泉聲

呂公洞在玉泉西二里觀音寺寺依山入門有洞深廣
二尋亦曰觀音洞昔呂仙憩此去而洞名也

呂公岩下臨一潭廣丈餘山上有看花臺卷幔樓

查慎行呂公洞詩只道山窮水亦窮忽攀石磴與
雲通芙蓉殿底三重閣楊柳橋南一面風老去文
人多入道從來絕境必凌空知君欲傲長江簿佛

號曾呼禁苑中

山頂卽金章
宗芙蓉殿址

○昭化寺在玉泉山麓元世祖建

○崇真觀在玉泉山下觀外小澗環流清淺可度前累
石爲臺下甃方池池上有斗室曰靈淵齋

上華嚴寺下華嚴寺俱明正統間建其額英廟勅賜寺

有二洞一在山腰一在殿後曰七真洞或云卽翠華洞洞中石壁鐫元耶律丞相一詞明大學士夏言和之亦鐫于壁

元耶律楚材鷓鴣天詞花界傾頽事已遷浩歌遙望意茫然江山王氣空千劫桃李春風又一年橫翠嶂架寒烟野花平碧怨啼鴉不知何限人間夢併觸沈思到酒邊

明夏言和詞人世滄桑有變遷靈岩玉洞自巋然朝衣幾共游山日佛界仍存刻石年嗟歲月惜夙風烟等閒花發又啼鴉只將彩筆題僧壁玉帶長留向日邊

○金山寺在華嚴寺右半里山有玉龍洞洞出泉瑩石爲暗渠引水伏流約五里入西湖名曰龍泉望湖亭建其上

明張治望湖亭詩望湖亭下水如天會記宣皇賜幸年玉輦不來鳬雁冷一湖楊柳鎖寒烟

○玉泉山右西向名瓦窰頭有隆佑菴僅數廡垂柳名花楚楚可翫

香岩寺在華嚴寺東妙高峯下寺後有妙高塔山麓折而北爲羅漢洞上爲水月洞

敬一主人

諱國璵

香岩寺詩雨霽空山夕尋幽入杳

冥雲封千澗白露濯萬峯青飛鳥依簷宿流泉伏枕聽朦朧空翠裏孤月自亭亭

長元按香岩寺卽玉峰塔影爲靜明園十六景之一又苑園門載玉泉上爲龍王廟南爲觀音洞真武廟呂祖洞洞旁爲雙關帝廟西南爲冠峯亭亭西爲迸珠泉稍北爲水月菴北爲聖緣寺寺北爲仁育宮奉天齊又西宮門外迤北有妙喜寺香露寺普通寺妙雲寺皆在 禁苑左右爲近時所建者其沿革未詳因附識于此

○法雲寺在西山後妙高峯下有雙泉鳴于左右寺門內甃爲方塘殿倚石石根兩泉源出焉西泉出經茶竈繞中雷東泉出經香積厨繞外垣匯于方塘所謂香水已金章宗設八院游覽此其一院草際斷碑香水院三字尚存

朱彝尊香水院詩壞磴接雲根流泉來樹底宛轉

入僧厨淙淙鳴不已

涿水亭在玉泉山麓大學士明珠別墅子侍講成德嘗
于此亭著大易集義粹言

朱彝尊臺城路詞一灣裂帛湖流遠沙堤恰環門
徑岸劃青秧橋連皂莢慣得游驄相並林淵錦鏡
愛壓水亭虛翠螺遙映幾日溫風藕花開遍鷺鷥
頂不知何者是客醉眠無不可有底心性砑粉長
箋翻香小曲比似江南風景看來也勝只少片天
斜樹頭帆影分我魚磯淺莎今到暝

查慎行涿水亭與唐實君話舊詩鑑裏清光落檻
前水風涼逼鷺鷥肩菰蒲放鴨空灘雨楊柳騎牛
隔浦烟雙眼乍開疑入畫一尊相屬話歸田江湖
詞客今星散冷落池亭近十年

宸垣識畧卷十四

早稲田大学図書館

011688998281